


Vischnaunca da Breil



Ordinaziun davart il tener tgauns

2018

| | | |
|------|----|---|
| Art. | 1 | Principi |
| | 2 | Obligaziun d'annunzia |
| | 3 | Obligaziun da pagar taxa |
| | 4 | Deliberaziun dalla taxa |
| | 5 | Termin da pagar la taxa |
| | 6 | Diever dallas taxas da tgauns |
| | 7 | Obligaziun dil possessur da survegilar il tgaun |
| | 8 | Violaziun/sancziuns |
| | 9 | Tgauns mulestus e prigulus |
| | 10 | Loghens scumandai per tgauns |
| | 11 | Surpassaments |
| | 12 | Recuors |
| | 13 | Entrada en vigur |

Art. 1

Principi

Tut ils habitonts e hosps che possedan ni tegnan tgauns ed avdan permanentamein ni temporarmein ella vischnaunca da Breil ein suttamess allas prescripziuns da questa ordinaziun. Per tut quei ch'ei buca reglau en questa ordinaziun valan las leschas ed ordinaziuns dil cantun Grischun.

Art. 2

Obligaziun d'annunzia

Scadin possessur da tgauns cun domicil en vischnaunca da Breil ei obligaus d'annunziar persunalmein siu tgaun alla canzlia communal sco suonda:

- enteifer treis meins dapi la naschientscha dil tgaun;
- enteifer 30 dis dapi igl acquist dil tgaun;
- enteifer 30 dis dapi ch'il possessur dil tgaun ha priu domicil en vischnaunca.

Art. 3

Obligaziun da pagar taxa

Cun l'annunzia eis ei da pagar ina taxa annuala per il tgaun. Vegnan plirs tgauns teni en ina casada, vala per igl emprem la taxa semplia. Per mintga ulteriur tgaun vegn la taxa augmentada. L'altezia dalla taxa ei fixada ella lescha da taglia communal.

Per tgauns ch'ei en pensiun e che fan buca pli il survetsch tenor art. 4 ei il possessur obligaus da pagar la taxa.

Art. 4

Deliberaziun dalla taxa

Deliberai dalla taxa, denton buca dall'obligaziun d'annunzia ein:

- tgauns da sanitad
- tgauns da militar
- tgauns da polizia
- tgauns da securitas
- tgauns da lavinas
- tgauns per personas tschoccas e suordas
- tgauns da protecziun
- tgauns per diabetichers
- tgauns da terapia

ch'ei en survetsch d'ina instituziun publica ni d'ina organisaziun da salvament reconuschida dalla vischnaunca ni che surveschan sco accumpignaders da personas tschoccas.

Il s tgauns ston haver absolviu ils examens da qualificaziun prescrets.

Sch'il tgaun vegn buca tenius durant igl entir onn sin igl intschess communal, vegn la taglia debitada pro rata, denton silmeins per 3 meins (lescha da taglia communal).

Art. 5

Termin da pagar la taxa

Las taxas ston vegnir pagadas mintgamai l'entschatta digl onn calendar, resp. sil pli tard 30 dis suenter l'annunzia d'in tgaun, eventualmein pro rata temporis.

La cumpetenzza da deliberar dalla taxa tenor art. 4 ei resalvada alla suprastanza communal.

Art. 6

Diever dallas taxas da tgauns

Las taxas da tgauns vegnan duvradas:

- a) per curclar ils cuosts administrativs che seresultan tras la realisaziun da questa ordinaziun.
- b) per construir e mantener ils indrezs publics che surveschan per tener ils tgauns a moda sauna ed higienica.

Art. 7

Obligaziun dil possessur da survigilar il tgaun

Igl ei scumandau da schar trottar entuorn tgauns buca survigilai. Els ston vegnir menai per la corda, sch'igl ei da temer ch'els savessen bandunar la persuna che ha la survigilonza. Atras vischnaunca, sin vias d'uaul e sper igl uaul sco era sin vias da spassegiar ston ils tgauns adina vegnir menai per la corda.

Il s possessurs da tgauns ein obligai da procurar che lur tgauns fetschien buca lur basegns sin vias, passapeis, plazzas e parcs publics e privats sco era sin praus e pastiras. Per quei intent duei ins sche pusseivel far diever dallas commoditads da tgauns. Tgauns malsauns ni cognas che cuoran ston vegnir menai per la corda.

Art. 8

Violaziun/sancziuns

Tgauns che cuoran entuorn senza survigilonza, excepti ein tgauns da catscha durant la catscha bassa, san vegnir pigliai dils organs forestals, dalla polizia ni dil survigilader da catscha. Sch'il possessur vegn buc enteifer 5 dis per siu tgaun e paga ina taxa ed ils cuosts per il pavel, vegn decidiu tgei far cun igl animal senza ch'il possessur sa pretender in'indemnisaziun.

Art. 9

Tgauns mulestus e prigus
Ils possessurs da tgauns ston procurar che quels mulestien buc ils vischins e la publicitad entras canera e tschuffadad ni autruisa. Tgauns che han attaccau, smanatschau ni miers carstgauns ni animals ston vegnir menai per la corda, ston purtar buccari ni vegnir dismiss senza indemnisaziun. Sch'ei vegn inoltrau en quei risguard in'annunzia ni in plogn, relai la suprastonza communal ina decisiun corrispudenta.

Art. 10

Loghens scumandai per tgauns
Igl ei scumandau da prender tgauns en scolas, sin plazzas da giugs per affons, en baselgias, sin santeris, en bogns cuvretgs e bogns aviarts, en stizuns da victualias e localitads ufficalas. Excepi ein tgauns per personas tschoccas e tgauns da terapia. Medemamein eis ei scumandau da prender tgauns sin pistas da skis e loipas da cuorsa liunga buca marcadas specialmein per quei intent. En parcs, ustrias e hotels ston tgauns vegnir menai per la corda. Els astgan vegnir pervesi mo ord vischala speciala per tgauns ed astgan buca far diever da mobillas da seser. Tener tgauns en stizuns da victualias, en ustrias ni hotels ei scumandau.

Art. 11

Surpassaments
Surpassaments da questa ordinaziun punescha la suprastonza communal cun ina reprimanda ni cun in castitg da tochen CHF 500.—. Las prescripziuns da leschas federalas e cantunalas restan resalvadas.
En grevs cass sa la suprastonza communal ordinar da dismetter il tgaun senza ch'il possessur sa pretender in'indemnisiun. Per cass che quel snega d'ademplir il camond, vegn igl animal dismiss entras la polizia.

Art. 12

Recuors
Encunter decisiuns e disposiziuns dalla suprastonza communal san ins far recuors. Decisiuns e disposiziuns ston cuntener ils mieds legals che stattan a disposiziun al pertuccau.

Art. 13

Entrada en vigur Questa ordinaziun ei vegnida approvada dalla suprastonza communal a ella seduta dils 28 da matg 2018 ed entra en vigur retroactiva sin igl 1. da schaner 2018. Ella remplazza tut las leschas vertentas dallas anteriuras vischnauncas d'Andiast, Breil e Waltensburg/Vuorz.

En num dalla suprastonza communal

Il president: *Clau Schlosser*

Igl actuar: *Curdin Cadonau*